

Impedir il squaz da terren – cun iniziativa u cuntraproposta

Ina parlamentara grischuna en il comité d'iniziativa

CUN SILVA SEMADENI
HA DISCURRÌ CLAUDIA CADRUVI / ANR

■ **Ella sesa en il comité da l'iniziativa per la cuntrada. L'emna proxima ha cussegliera naziunala Silva Semadeni (ps/GR) da condecider sche l'iniziativa vegn tratga enavos u betg.** Ier è il cussegl naziunal suandà la chombra pitschna ed ha recumandà cun 114 cunter 72 vuschs da refusar l'iniziativa da la cuntrada. Il parlament propona sco cuntraproposta la revisiun da la planisaziun da territori. La votaziun finala davart la revisiun da lescha fa il parlament l'emna proxima. La revisiun preveda tranter auter ina taxa sin l'augment da valor sch'in terren vegn en la zona da construcziun. Ils chantuns dastgan far zonas da construcziun be sco reserva per 15 onns. Il terren ch'è danvanz ston ins prender or da la zona.

Als iniziants pondereschan da trair enavos l'iniziativa. Pertge?

Silva Semadeni: Nus avain fatg l'iniziativa per sensibilisar il pievel – e per che la politica surpiglia responsabladad. L'artitgel che nus avain oz en la constituiun na fiss en sasez gnanca uschè

mal. Il pievel ha dentant mo la pussaivladad da proponer in artitgel constituiun en in'iniziativa. Igl è oravant tut impurtant co ch'ins pratitgescha la planisaziun da territori. Perquai essan nus adina stads perencletgs che la confederaziun prepara in cuntraproposta.

Uss ha il parlament deliberà la cuntraproposta – ina revisiun da la lescha da planisaziun da territori – i manca be anc la votaziun finala. Tge è bun vi da questa cuntraproposta?

I dat blers puncts ch'èn buns, per exempel l'obligaziun da redimensiunar zonas da construcziun memia grondas u er la pussaivladad da pajar indemnisaziuns. Ils plans directivs chantunals survegnan dapli paisa.

È la cuntraproposta meglra che l'iniziativa sezza?

L'iniziativa fiss be in artitgel en la constituiun. La cuntraproposta è ina lescha che realisescha gia pli u main quai che nus vulevan. Quai è in element positiv. Per l'iniziativa stuessan nus anc far ina lescha e reglar punct per punct.

Als mastergnants smanatschan cun il referendum. Els na van betg d'accord cun la cuntraproposta. Co sa stallegian ils iniziants cun trair enavos l'iniziativa?

Il comité sa chatta ils 15 da zercladur e decida: trair enavos l'iniziativa u betg. Sche nus tirain enavos l'iniziativa, fiss quai be in trair enavos cundiziunà. Tar in referendum restass l'iniziativa activa. Alura vegness vuschà l'emprim davart il referendum che cumbatta la cuntraproposta. Sch'il pievel refusass lura la cuntraproposta vegness suenter tuttina anc l'iniziativa en votaziun.

Tge muntassi sche la cuntraproposta ed anc l'iniziativa vegnessan refusadas?

Quai fiss dramatic. En il parlament ha mintgin ditg – era la cussegliera federala *Doris Leuthard* – che nus avain per il mument in squaz da terren. Quai ston ins reducir. Pertge er en il futur duain ins anc pudair construir. Er las generaziuns vegnentas vulan realisar lur projects.

